

Mál nr. 188/2023

Nafn málskotsaðila (M)

Nafn varnaraðila : V1 og V2

Heiti váttryggingar: Ábyrgðartrygging ökutækis.

Skráningarnúmer ökutækja: A og B

Sakarskipting.

Gögn.

1. Málskot mótttekið 26. maí 2023, ásamt fylgiskjölum.
2. Bréf V1, dags. 19. júní 2023, ásamt fylgiskjölum.
3. Bréf V2, dags. 16. júní 2023, ásamt fylgiskjölum.
4. Viðbótarathugasemdir M, dags. 26. júní 2023.

Málsatvik.

Samkvæmt fyrirbyggjandi lögregluskýrslu varð árekstur á Kjalarnesi hinn 20. apríl 2023 milli bifreiðanna A sem M ók, og B. Áreksturinn varð með þeim hætti að ökumaður A hafði lagt bifreið sinni út í vegkanti, hægra megin við veginn en ökumaður B ók á eftir. Er ökumaður B var kominn upp að hlið bifreiðarinnar A, tók ökumaður þeirrar bifreiðar snögglega vinstri beygju með þeim afleiðingum að árekstur varð. Í framburði ökumanns A kveðst hann hafa ekið Vesturlandsveg til suðurs, stöðvað bifreið sína í vegkanti, litið í alla spegla til þess að athuga hvort umferð væri nálægt. Kveðst ökumaður A hafa séð til bifreiðarinnar B fyrir aftan sig en talið að hún væri í nógu mikilli fjarlægð til þess að taka vinstri beygju inn á afleggjarann að Vallá en svo reyndist ekki vera. Ökumaður B kveðst hafa séð hvernig bifreiðinni A var lagt út í vegkanti hægra megin við veginn og er hann hafi verið að aka framhjá bifreiðinni og verið kominn við hlið hennar hafi henni verið ekið inn á akreinina. Kveðst ökumaður hafa ekið á 70 km/klst. hraða. Ágreiningur um sakarskiptingu var lagður fyrir tjonanefnd váttryggingafélaganna sem komst að þeirri niðurstöðu í máli nr. 236/23 að ökumaður A bæri alla sök á árekstrinum þar sem honum bar að veita allri umferð um Vesturlandsveg forgang. M sem er eigandi A er ósáttur við þá niðurstöðu. Telur hann að bifreiðinni B hafi verið ekið á meiri hraða en ökumaður gaf upp. Þannig hafi ökumaður A séð bifreiðina langt í burtu þegar hann gaf stefnuljós til að beygja/snúa við og metur það á þann hátt að hann eigi að geta snúið við áður en bifreiðin kæmi nær. Árekstrarstaður hafi verið merkt vinnusvæði þar sem gæta skuli varúðar. Óskar M þess að fá skýrari mynd af atvikinu.

V1 skilar ekki athugasemdum í málinu.

Afstaða V2 er sú að ökumaður A hafi ekki gætt nægilega að 2. mgr. 20. gr. umferðarlaga nr. 77/2019 er hann ók af stað frá vegbrún frá hægri vegöxl, inn á Vesturlandsveg og í veg fyrir bifreiðina B. Þá hafi ekki verið sýnt fram á að háttsemi ökumanns B heri verið til þess fallin að valda umræddum árekstri.

Álit.

Rétt er að taka það fram að nefndin rannsakar ekki mál sem lögð eru fyrir nefndina, heldur byggir úrskurði sína á lagareglum, stjórnvaldsfyrirmælum, venju, fordæmum og öðrum réttarheimildum svo sem samningum aðila og öðrum fyrirbyggjandi gögnum sbr. 1. mgr. 10. gr. samþykka nefndarinnar. Samkvæmt 2. mgr. 20. gr. umferðarlaga nr. 77/2019 ber ökumanni, áður en hann ekur af stað frá vegarbrún, skiptir um akrein eða ekur á annan hátt til hliðar, að ganga úr skugga um að það sé unnt án hættu eða óþarfa óþæginda fyrir aðra. Samkvæmt 3. mgr. 26. gr. umferðarlaga nr. 77/2019 skal ökumaður veita umferð forgang hvarvetna þar sem ekið er inn á veg af bifreiðastæði, lóð eða landareign, bensínstöð eða svipuðu svæði utan vegar eða af vegslóða, stíg, göngugötu, vistgötu, heimreið, vegöxl eða yfir gangstíg, gangstétt eða hjólastíg. Fyrir liggur að ökumaður A ók bifreið sinni út á Vesturlandsveg frá vegöxl í veg fyrir bifreiðina B sem ekið var eftir Vesturlandsvegi í átt að Reykjavík. Án frekari gagna, svo sem vitnisframburða eða sérstaks hraðaútreiknings, er ekki hægt að byggja á því að ökumaður B hafi ekið of hratt á vettvangi. Vitni sem gaf sig fram á vettvangi og V1 aflaði framburðar frá getur ekki til um hraðaksturs bifreiðarinnar B. Verður ökumaður A því að bera hallan af sönnunarskorti um of hraðan akstur ökumanns B eða að háttsemi hans hafi brotið í bága við ákvæði umferðarlaga eða fyrirmæli á vettvangi. Öll sök á ökumann A fyrir að hafa ekið inn á Vesturlandsveg af vegöxl í veg fyrir bifreiðina B.

Niðurstaða.

Ökumaður A ber alla sök á umræddum árekstri.

Reykjavík, 15. ágúst 2023.

Þóra Hallgrímsdóttir

Hildigunnur Hafsteinsdóttir

Heiða Óskarsdóttir